

VENDIM
Nr. 91, datë 2.12.2015

**PËR DISA NDRYSHIME NË RREGULLOREN “PËR RAPORTIN E
MJAFTUESHMËRISË SË KAPITALIT”**

Në bazë dhe për zbatim të nenit 12, shkronja “a”, dhe nenit 43, shkronja “c”, të ligjit nr. 8269, datë 23.12.1997, “Për Bankën e Shqipërisë”, i ndryshuar; nenit 58, shkronjat “a”, “b”, “c” dhe “ç”, nenit 59, pikat 2 dhe 3, dhe të nenit 60, pika 2, të ligjit nr. 9662, datë 18.12.2006, “Për bankat në Republikën e Shqipërisë”, i ndryshuar; me propozim të Departamentit të Mbikëqyrjes dhe Departamentit të Stabilitetit Financiar dhe Statistikave, Këshilli Mbikëqyrës i Bankës së Shqipërisë,

VENDOSI:

1. Në rregulloren “Për raportin e mjaftueshmërisë së kapitalit”, miratuar me vendimin e Këshillit Mbikëqyrës nr. 48, datë 31.07.2013, të bëhen ndryshimet e mëposhtme:

a) Përmbajtja e nenit 6 ndryshon si më poshtë vijon:

“1. Bankat llogarisin ekspozimet e ponderuara me rrezikun, si shumë e elementeve të mëposhtme:

a) zërave të ekspozimeve dhe ekspozimeve të mundshme, të ponderuar me rrezikun e kredisë dhe rrezikun e kredisë së kundërpartisë, të llogaritura sipas metodës standarde, të përcaktuar respektivisht në kreun III dhe në kreun VI të kësaj rregulloreje;

b) kërkesës për kapital për rrezikun e tregut, të llogaritur sipas kërkesave të përcaktuara në kreun VII të kësaj rregulloreje, të shumëzuara me 12.5;

c) kërkesës për kapital për rrezikun operacional, të llogaritur sipas metodës së treguesit të thjeshtë ose sipas metodës standarde, të përcaktuara në kreun VIII të kësaj rregulloreje, të shumëzuara me 12.5.

2. Pavarësisht përcaktimeve në paragrafin 1 të këtij neni, banka rregullon totalin e aktiveve dhe të zërave jashtë bilancit të ponderuar me rrezikun, siç përcaktohet më poshtë:

a) duke e shtuar me vlerën e rritjes që rezulton në krahasim me muajin mars 2013, të klasave në aktiv të bilancit “veprimet me thesarin dhe transaksionet ndërbankare” dhe “veprime në valutë me tituj” me jorezidentët, pasi të jetë zbritur vlera e shtuar e detyrimeve ndaj jorezidentëve në valutë, që i përkasin të njëjtave klasa në atë periudhë raportuese;

b) për vitin 2016:

i) për periudhën 1 janar – 30 qershor 2016, duke e pakësuar me vlerën që rezulton nga një prej dy llogaritjeve të mëposhtme:

1) vlerën e rritjes së tepriçës bruto të kredisë për klientët¹, të akorduar brenda vendit, në periudhën e raportimit, e kthyer në bazë vjetore, në krahasim me muajin dhjetor 2015, në rast se kjo rritje është më e madhe se 4 (katër) % dhe më e vogël ose e barabartë me 10 (dhjetë) %;

2) vlerën 10 (dhjetë) % të tepriçës bruto të kredisë për klientët të akorduar brenda vendit, në krahasim me muajin dhjetor 2015, në rast se rritja në periudhën e raportimit, e kthyer në bazë vjetore, është më e madhe se 10 (dhjetë) %;

ii) për periudhën 1 korrik – 31 dhjetor 2016, duke e pakësuar me gjysmën e vlerës që rezulton nga një prej dy llogaritjeve të mëposhtme:

1) vlerën e rritjes së tepriçës bruto të kredisë për klientët², të akorduar brenda vendit, në periudhën e raportimit, e kthyer në bazë vjetore, në krahasim me muajin dhjetor 2015, në rast se kjo rritje është më e madhe se 4 (katër) % dhe më e vogël ose e barabartë me 10 (dhjetë) %;

2) vlerën 10 (dhjetë) % të tepriçës bruto të kredisë për klientët të akorduar brenda vendit, në krahasim me muajin dhjetor 2015, në rast se rritja në periudhën e raportimit, e kthyer në bazë vjetore, është më e madhe se 10 (dhjetë) %.

¹ Sipas Sistemit Raportues të Unifikuar, përfshihen: “Individët”, “Njësitë tregtare dhe industriale private”, “Njësitë tregtare dhe industriale publike”, “Punonjësit e bankës” dhe “Klientët të tjerë”.

² Sipas Sistemit Raportues të Unifikuar, përfshihen: “Individët”, “Njësitë tregtare dhe industriale private”, “Njësitë tregtare dhe industriale publike”, “Punonjësit e bankës” dhe “Klientët të tjerë”.

3. Përlllogaritjet sipas përcaktimeve të shkronjave “a” dhe “b”, të paragrafit 2, bëhen sipas formularit 1 dhe 2, aneksi 8.

4. Shkronjat “a” dhe “b”, të paragrafit 2, të këtij neni, janë në fuqi deri në fund të vitit kalendarik 2016.

5. Në përfundim të afatit të përcaktuar në pikën 4 të këtij neni, banka respekton nivelin minimal të raportit të mjaftueshmërisë së kapitalit sipas nenit 5 të kësaj rregulloreje ose përcaktimeve të tjera të Bankës së Shqipërisë.

a) formularët 1 dhe 2 të aneksit 8, ndryshojnë si bashkëlidhur këtij vendimi;

b) në formularin 9 të aneksit 7, rreshti i fundit ndryshon në “Pakësimet për rritjen e portofolit brenda vendit për vitin 2016”.

2. Ngarkohen Departamenti i Mbikëqyrjes dhe Departamenti i Stabilitetit Financiar dhe Statistikave me ndjekjen e zbatimit të këtij vendimi.

3. Ngarkohet Departamenti i Marrëdhënieve me Publikun për publikimin e këtij vendimi në Fletoren Zyrtare të Republikës së Shqipërisë dhe në Buletinin Zyrtar të Bankës së Shqipërisë.

Ky vendim hyn në fuqi më 1 janar 2016.

KRYETARI
Gent Sejko

ANEKS 8
FORMULARI I RAPORTIMIT NR. 1

Llogaritja e rritjes së totalit të aktiveve të ponderuara me rrezik, bazuar në klasat “Veprimet me thesarin dhe transaksionet ndërbankare” dhe “Veprimet me letrat me vlerë” jorezidente në valutë	
(në mijë lekë)	
Emri i bankës	
Periudha raportuese	
Data e raportimit	
Përgatiti (emër, mbiemër, firmë)	
Drejtuesi (emër, mbiemër, firmë)	

Nr.	Llogaritja e rritjes së totalit të aktiveve të ponderuara me rrezik, bazuar në klasat “Veprimet me thesarin dhe transaksionet ndërbankare” dhe “Veprimet me letrat me vlerë”, të jorezidentëve në valutë	Mënyra e llogaritjes
1	Totali i zërave të aktivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë” të jorezidentëve në valutë, mars 2013	(a)
2	Totali i zërave të aktivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë”, të jorezidentëve në valutë në periudhën raportuese	(b)
3	Rritja e zërave të aktivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë”, të jorezidentëve në valutë	(c) = (b) - (a)
4	Totali i zërave të pasivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë” të jorezidentëve në valutë, mars 2013	(d)
5	Totali i zërave të pasivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë”, të jorezidentëve në valutë në periudhën raportuese	(e)
6	Rritja e zërave të pasivitetit “Veprimet me thesarin dhe transaksionet ndërbankare” dhe i “Veprimeve me letrat me vlerë”, të jorezidentëve në valutë	(f) = (e) - (d)

7	Shtesa e totalit të aktiveve dhe zërave jashtë bilancit të ponderuar me rrezik	$(g) = 0$ nëse $(c) \leq 0$ ose $(c) < (f)$; $(g) = (c)$ nëse $(f) < 0$ $(g) = (c) - (f)$ nëse $(f) > 0$
---	--	---

FORMULARI I RAPORTIMIT NR. 2

Nr.	Llogaritja e pakësimit të totalit të aktiveve dhe të zërave jashtë bilancit të ponderuar me rrezik, bazuar në rritjen e portofolit të kredisë bruto brenda vendit	Mënyra e llogaritjes
1	Portofoli i kredisë bruto, në dhjetor 2015	(a)
2	Portofoli i kredisë bruto, në periudhën raportuese 2016	(b)
3	Rritja e portofolit të kredisë, 2016	$(c) = (b) - (a)$
4	Rritja e portofolit të kredisë për 2016-n, me bazë vjetore, sipas periudhës raportuese: - nëse periudha raportuese është mars 2016 - nëse periudha raportuese është qershor 2016 - nëse periudha raportuese është shtator 2016 - nëse periudha raportuese është dhjetor 2016	$(d) = (c) * 4$; $(d) = (c) * 2$; $(d) = (c) * 4/3$ $(d) = (c)$
5.	4% e portofolit të kredisë së dhjetorit 2015	$(e) = (a) * 4\%$
6.	10% e portofolit të kredisë së dhjetorit 2015	$(f) = (a) * 10\%$
7.	Pakësimi i aktiveve dhe zërave jashtë bilancit të ponderuar me rrezik, vetëm mars 2016 dhe për qershorin 2016	$(g) = 0$ nëse $(d) < (e)$; $(g) = (c)$ nëse $(e) < (d) < (f)$; $(g) = (f)$ nëse $(d) > (f)$
8.	Pakësimi i aktiveve dhe zërave jashtë bilancit të ponderuar me rrezik, vetëm shtator 2016 dhe për dhjetorin 2016	$(g) = 0$ nëse $(d) < (e)$; $(g) = 50\% * (c)$ nëse $(e) < (d) < (f)$; $(g) = 50\% * (f)$ nëse $(d) > (f)$